

## ■ NOVITADS MUSICALAS

# Duo en treis

DA SIMON CAMARTIN

Quei ei il tetel cuntradictoric d'in disc cumpact publicaus igl onn vargau. Protagonists dil disc ein treis persunas: il cumponist grischun Meinrad Schütter (1910–2006) e las musicistas Stefania Huonder (mezzosopran) ed Ute Stoecklin (clavazin). Las musicistas han sco duo concertau ensemen duront biars onns e surtut ein ellas s'engaschadas sco negin auter per la musica da Meinrad Schütter. En treis han Schütter, Huonder e Stoecklin preparau l'ediziun da quei disc cumpact ch'ei daventaus in omagi al cumponist.

Il disc ha ina clara lingia tematica: tuttas canzuns documenteschan il fil tgiettschen dallas quater stagiuns e da reflexiuns musicalas en ovras da Meinrad Schütter, Othmar Schoeck, Jean Sibelius ed Edvard Grieg. Igl ei pia tut auter ch'in samelsuri occasional da canzuns sco quei ch'ins engarta meinsvart tier recitals da canzuns

Segir sveglia l'ovra dil cumponist grischun il pli grond interess, cunquei che

ellas ein novitads discograficas. Denton era igl engaschi missiunatic ed apologetic per Schütter dallas duas interpretas fan l'ureglia attenta. Cheu sentan ins che la pianista Ute Stoecklin ei buca mo cuschada cun las particularitads idiomaticas dil lungatg musical da Schütter. Stoecklin demuossa era ina habilitad pianistica che survarga per bia in accumpignament pur, anzi capescha ella da scalprar cun aulta habilitad pianistica ils elements musicals impurtonts ella factura dall'ovra. La cantadura cun sia vusch plitost stgira e fuostga colurescha bein ed individualmein il caracter variont dallas singulas canzuns.

Las canzuns da Schütter ein screttas sur ina liunga perioda ora: da 1931 entochen 1994. Quei dat ina oreifra survesta dallas variaziuns el spectrum musical duront las differentas periodas creativas da Schütter. Ils texts romontschs (G. Caduff; A. Peer) s'accordan oreifer cun la musica ch'ei savens stgira ed aspra

**Schütter; Schoeck; Sibelius; Grieg: Duo en treis; Lieder; Stefania Huonder, Mezzosopran; Ute Stoecklin, Klavier; Swiss Pan 51 723**